



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :  Tir Yimym

 tir_yimym

 tir yimym

TAPAK 8

**Putin-i 'Easer truce' nangzükaka
maneni amaker: Zelenskyy**

**ISSF World Cup: Arjun
Babuta-i silver angu**

VOL. XXII ISSUE NO. 186 (ADOK 186)

DIMAPUR TENTION MONDAY

RONGCHII (APRIL) 21, 2025

₹ 5.00

NSF pusema kaketshir telok aikati tenokdangba agütsür; 'peaceful dharna' magizüker

Dimapur, April 20, 2025

(TYO): Nagaland state sorkari Nagaland Public Service Commission tatidang madeni assistant professors 147 mapanung shimokba atema sentong ayonga agiba nung madentsüla ta Naga Students' Federation (NSF)-i tetuyuba ka agütsüba sülen kaketshir telok aikati iba ya pusema nungitba metetdaksüogo.

Ao Kaketshir Mungdang (AKM), Angami Students' Union (ASU), Zeliang Students' Union Nagaland (ZLSUN), All Sümi Students Union (SKK), Lotha Students Union (LSU), Angami Students' Union (ASU), Chakhesang Students' Union (CSU) aser Sangtam Students' Union Dimapur (SSUD) teloki sangdong balala agütsüogo.

Nagaland sorkari contract mapanung inyakertem absorp/regularize asüba pusema "peaceful dharna" ayongzükba nung temalen agüja kaketshir teloktemi pei pei züngsemtem shilem magitsü tekümdangtsü metetdaksüogo.

April 21 nü Nagaland nung government colleges ajak nung "peaceful dharna" agitsü ayongzuka lir.

Ao Kaketshir Mungdang

(AKM)-i government colleges nungi kaketshirtem aser tesayurtemi sentong agitsü ayongzükba atema aoksar ta metetdaksüogo.

Iba ama sentong ya agitsü temelaba agütsüra, iba ajanga kaketshirtem tim masüba leni anitsü. Iba ya timi aser ashishitep melii inyaksangshiba tangatetba anema lir, ta AKM-i ashi.

AKM-isa parnok kübok units aser züngsem ajak dang government college tem nung ayongzükba sentong nung shilem magitsü metetdaksüogo. Iba tetuyuba anema inyakertem AKM temzüng nung lateta aliba ama temerenshi alitsü ta parnokisa shisem.

"Tim masüba inyakba pusema nungitbaji ochimashi pusemba den kasa lir. Sorkar mapaninyaknür meyirjang aika lir anungji tashiyim agi lemtet kar agiba ajanga parnok majembangtsüla. Nisung ajaki iba tashiyim mapanema noktaksüla aser iba ya temeten meshiba dang masü saka tarutsü tajung atema lir" ta AKM-isa metetdaksü.

Nagaland Public Service Commission (NPSC) majangi contract nung inyakertem

regularize asüba magizüker anungji state sorkari Cabinet lemtet meyipa agitsüla aser NPSC ajanga timi tesayurtem shimoktsüla ta AKM-isa ashi.

Contract nung inyakba tesayurtemi küm aika tenzüka aruba atema pelar saka iba ajanga parnok regularize asüba metentsü makok. Sorkari NPSC ket nung mapang shitak nung mapanmagitsüba ajanga contract nung inyakba tesayur aika employment age limit adenogo anungji iba tebilemtsü ta state sorkari abentsü ta parnokisa ashi.

AKM-isa state sorkar dang ajak nem temeten ngudakja contractual tesayurtem mapanungi manentsütsüla saka khen atema mapamaneni inyakdaksütsüla ta ayongzükogo.

"Telok shingaia tai maketba kaketshirtem anisatsü memerangtsüla" ta Angami Students' Union (ASU)-ia sangdong ka nung ashi.

NSF-i sangdong agütsüba nenshia ASU-isa kija/telok/bangdakpur shinga nema tim masüba sentong ayonga magidaksütsü ta shiogo.

Kari danga kaketshirtem aser mapaninyaknürtem anema inyaksangshira onoki odangbo

meyutsütsü ta ASU-isa nung metetdaksü.

Chakhesang Students' Union (CSU)-isa parnok kübok unit aser züngsem ahak dang Assistant Professors absorp asüba pusema ayongba sentong nung shilem magitsü tetuyuba agütsüogo.

Lotha Students' Union (LSU)-ia ochimashi, tejak repranga inyakba mesüra tim masüba pusema nungitba sentong kecha nunga shilem magitsü metetdaksüogo.

Mount Tiyi College nung sentong ayongba nung LSU züngsem shingaia shilem magitsüla ta parnokisa ashi.

April 21 anepdang 7:00 ako nung Ranges, Circles, aser Units ajaki volunteer 10 Mount Tiyi College campus tonga arutsü metetdaksür ta LSU-isa ashi.

Mount Tiyi College, Wokha nung Principal-i April 19 nü sangdong ka nung Hombarnü college campus nung "peaceful dharna" ka alitsü sangoktsüba sülen LSU-i iba tetuyuba agütsü.

All Sümi Students' Union (SKK)-ia Sümi nunger aliba tesem ajak nung Sümi kaketshirtemi regularization pusema ayongzükba sentong

madentsü metetdaksüogo. Zeliang Students' Union Nagaland (ZLSUN)-ia April 8, 2025 nü sorkari absorption order agütsüba magizükba metetdaksüogo.

Parnokisa state sorkar dang iba lemtet meyipa agitsü aser merit-based recruitment inyaksü takhangba agütsüogo.

Chakhesang Students' Union (CSU)-ia parnok units aser züngsem ajak dang assistant professors 147 absorp asüba pusema nungitba sentong nung shilem magitsü tetuyuba agütsüogo.

Iba tetuyuba anema inyakertem Union temzüng kübok temerenshi alitsü ta CSU-isa metetdaksü.

Dimapur district nung sorkar rejutemi CTAN aser NNQF ajanga lungkak aitba anema Sangtam nunger kaketshirtem tashiyim agi shilem agidaksütsü merangba magizüker ta Sangtam Students' Union Dimapur (SSUD)-ia metetdaksü.

Ibala inakyim ya kija ka tangatetba anema lir aser tashiyim agi kaketshirtem tim masüba ka pusema nungitdaksütsü merangba memelatsü ta SSUD-isa ashi.

ANCSU-i unit ajak dang tuyur

Dimapur, April 20, 2025

(TYO): All Nagaland College Students' Union (ANCSU)-i sangdong ka nung 2017 Union Assembly Resolution nenshia metetdaksüogo.

ANCSU-i masü saka kija, telok, mesüra political party kari ayongzükba sentong mesüra sendentem nung member units shinga madentsü atema bangzüng renema lir ta ANCSU-

i metetdaksüogo.

Iba bangzüng ya tangar tashi nungi college tem kümzüka ayutsü aser shisaluyimba timi aotsü atema lir ta ANCSU-isa ashi.

April 15, 2025 nü Emergency Union Assembly amendant unit ajaki ANCSU-i inyakba onük atema electronic mesüra print media nung sangdong magütsütsü telemtetba ka agiogo.

Kohima nung Easter Sunrise Service agi

Dimapur, April 20, 2025

(TYO): Nagaland nung Khristan tamangertemi tanü Easter Sunday mungogo aser Kohima Local ground nunga Easter Sunrise service atema nisung aika adenshia shilem agi.

Easter Sunday ya Yisu Khrista-i tasü madak takok anguba aser tamangertem dang teti tatem makadak alitsü teimla agüja amunger.

Tanep sentong nung Nagaland Baptist Church Council, general secretary Reverend Dr. Mar Pongener-i o jembidang "Yisu Khrista shia aruba ajanga teimla aser

tekümtet agütsür" ta ashi.

"Tamangertemi Tsüngrem bushitsüla aser tatidang ajurudang Tanela Temeshi tashi amshitsüla. Yisu Khrista shia aruba ya tamangertem asoshi teimla aser tekümtet lir" ta paisa ashi.

"Yisu Khrista shia aruba atema asenok benjungteper. Tasü madak takok anguba aser tejashi mapang teimla. Leper tazüngla ajanga taküm tasen, tatem makaba teimla aser Pa ajanga teti tatem makadak alitsü tenangzükba agütsür" ta Nagaland Chief Minister Neiphiu Rio-ia metetdaksü.

DHE-i 'absorption' onük atema sangdong ka agütsür

Dimapur, April 20, 2024

(TYO): Department of Higher Education, Nagaland ajanga sangdong la nung Assistant Professors absorp asüba dak sendakba sentong nung tesayurtem aser kaketshirtem shilem magitsü metetdaksüogo.

Iba sangdong ya Higher Education & Tourism Minister-i tetuyuba agütsüba

nung ajemdaker agütsüba ama zülua lir aser sorkari iba tebilemtsü angatetteptsü atema sendaktepa alirtem den olemteptsü ta shia lir.

April 19, 2025 nü züluba sangdong ya V. Lovitoly Sema, Ex-Officio Director, Higher Education ajanga agütsü.

Telok balalai December 18, 2024 nü sorkar tetuyuba meyipa agitsü ola adokba

mapang ka nung state sorkar lemtet pusema nungitba telok kari ola adoktsü tenzükogo.

Nagaland nung government college aikati parnok faculty, staff aser kaketshirtem dang contract nung inyakba tesayurtem absorp asüba pusema April 21 nü sentongtem agitsü sangdong balala agütsüogo.

Central Nagaland Students' Association-i CTAN & NNQF pusema nungiter

Dimapur, April 20, 2025

(TYO): Combined Technical Association of Nagaland (CTAN) aser Nagaland NET Qualified Forum (NNQF) ajanga December 17, 2024 nü sorkar tetuyuba meyipa agitsü akhangba nung Central Nagaland Students' Association (CNSA)-ia pusema nungitba metetdaksüogo.

December 17, 2024 tetuyuba ya Department of Higher Education nung backdoor appointments 147 regularize asüba shia lir aser

iba ya meyipa agitsüla ta CNSA-i ashi.

Iba tetuyuba ajanga NPSC Common Educational Services Examination (CESE) tatidang agütsütsü renemertem mezüngmeshir ta parnokisa ashi.

"June 6, 2016 nü state sorkari contract appointments noktangba tetuyuba agüja aliba indang CTAN aser NNQF ajanga nenshiba ya kanga tim. Contract nung inyakertem regularize asüba ya iba tetuyuba anema lir aser iba

ajanga lendong aketba inakyim ka tenzüka yutsür" ta CNSA-isa metetdaksü.

Nagaland sorkar aser talisa Department of Higher Education-i kaketshirtem aser public ola angatsüla aser iba tim masüba tetuyuba meyipa agitsü ayongzükker ta CNSA-isa metetdaksü.

Onoki CTAN, NNQF aser kasa tangatetba telok ajak den külemi noktaker aser educational system nung timi inyaksangshitsü tayongzükba agütsür ta parnokisa shisem.

Manipur nung telungpur telok 8 nungi nisung 10 apu



Police temi pua aliba telungpur aser parnok ket nungi ngutetba oset ya Heirok police station indang Officer-in-Charge nem agütsüogo.

Imphal, Rongchii/April 20 (Agencies): Central aser state sepaitem lungjemer Manipur nung tesüiba ghonda 36 tsüngta operations balala agiba mapang telungpur telok balala nungi züngsem ter apu.

State police control room ajanga ashiba agi, tesüiba ita ishika tsüngta Imphal East, Bishnupur, Kakching aser Imphal West district tem nung party fund atema tashiyim amshia senotsü meshiba/saruba mechi item nisung ya apu.

Parnok ya Kangleipak Communist Party (KCP Taibangangba) nungi ka, KCP-People's War Group nungi ka, KCP-Meeyamgi Feengang Lanmee nungi ana, People's Revolutionary Party of Kangleipak (Prepak-Progressive) nungi ka, Prepak nungi ka, Kanglei Yaol Kanna Lup nungi ka, United People's Party of Kangleipak nungi ka aser United National Liberation Front (UNLF - Pambei) nungi ana alitsü.

UNLF-P ya tang centre den

yimjung asoshi jembishinüba mapang ka lir. Parnok ket nungi demand letters, sen 11,440, mobile phones 10 den Camouflage Helmet ka, Tactical Waist belt sentsü tanak ka, Knee cap/guards ana, Pistol holster ka, Camouflage long pant ka, Camouflage T-Shirts aser tsüngsem amala oset nguteta liasü.

Pua alirtem ya arishi küm 22 nungi 44 tsüngta lir.

Parnok den osettsüset ya tapet mera agitsü atema police station nem agütsüogo.

Tseminyu nung staff nurse dak teka sangshiba aitsür

Dimapur, Rongchii/April 20 (TYO): CHC Tseminyu nung on-duty staff nurse ka dak April 18, 2025 aonung Tseminyu village nungi Njilo Tep-i teka sangshiba atema khukhua aitsür, ta Nagaland In-Service Doctors' Association (NIDA) aser Rengma Doctors' Forum (RDF) sangdong ka ajanga ashi.

NIDA ajanga sangdong ka nung, sorkar mapa inyaker pa parnok mapa inyakra nung tetsükdaktsü agütsüba ya Indian Penal Code (IPC) indang Section 186 aser 353 kübok aibelen lir, ta ashi.

Tekolak nung azükba yagi nisung takum ka lendongi yoker aser ibai anga sashia yirutsüba ta IPC 320 kübok züngshir ta parnoki ashi.

"Healthcare mapa inyaker ka duty nung lia merenshiba ya The Epidemic Diseases (Amendment) Act 2020 kübok merenshitsü langa aliba aibelen lir."

"Aibelen ya tejangja aser bail magütsür. Healthcare mapa inyaker anema azüdokshiba tali akumer aser khenyongi tatok magütsütsüla," ta NIDA ajanga ashi.

NIDA ajanga tim ketdangsür dang tarutsü nung iba ama mapa tamajung meinyaktsüsa tapet temerenshi agütsütsü ajungshir, ta sangdong ajanga ashi.

Rengma Doctors' Forum (RDF)-ia sangdong ka nung CHC Tseminyu nung staff

nurse Opangkokla dak shiranger meina arur Njilo Tep-i züka merenshiba aija liasü. La mapa shidak inyakra alidang tai tonglokja alisang yi agi meseper arua merenshi, ta RDF ajanga ashi.

"Iba tatalokba ya frontline health worker anema tapi agi mapa tamajung inyakra kisüing masü saka healthcare profession anema inyakra lir. Iba ama yimya tamajung ajanga health staff aser talisa tensa tamajung nung tenzüker mulungjang nung tetsübo aitdaktsür," ta forum ajanga ashi.

Forum ajanga district administration aser police dang tekeratiba nung tapet mera agia aibelener nem tapet temerenshi agütsütsü ajungshir, ta ashi.

"Medical aser paramedical staff tem, talisa amjang nung inyaker kumzüka ayutsü asoshi district nung healthcare institutions ajunga nung security reprangshitsü ayongzüker," ta RDF ajanga ashi.

Iba tatalokba atema Trained Nurses' Association of India (TNAI), Nagaland Branch-ia tejashi lemsatepa liasü.

Sorkar tenzüker ka pei mapa inyakra lia tapi agi merenshiba ya aibelen tulu lir, ta TNAI Nagaland ajanga ashi.

Timtem ajurur alir atema kisüing masü saka tarutsü nung healthcare workers anema mapa tamajung inyaker nem

tatok magütsütsü ta angatetdakja ochi obendang agütsütsü ajungshir, ta ashi.

"Onoki iba timtem ajurur aliba nurse ya lai mulungba facility kati transfer asütsü ajungshir, kechiaser la tang teinyakdak tesem nung la takum kumzüka mali ta temulung nung tetsübo aitadokogo. Nurse kata tetsübo nung mapa meinyakdaktsütsüla," ta TNAI ajanga ashi.

"Iba tatalokba yagi ano maneni tetsür healthcare mapa inyaker kumzüka ayutsü asoshi tekeraba nung mera agitsü sayur," ta ashi.

Kasa mapang CHC Tseminyu nung nurse inyaker Opangkokla (S/N) duty nung lia shiranger meina arur Njilo Tep (Tseminyu village) ajanga April 18, 2025 aonung 11:00 ako meta teka sangshiba atema Ao Senso Telongjem Tseminyu ajanga FIR ka benoka lir, ta Dr. Asano Sophie, Senior Medical Officer, Tseminyu ajanga Deputy Commissioner Tseminyu dang iba tatalokba indang osang agüja liasü.

Anungji iba tangatetba nung CHC Tseminyu ajanga NGO aser kinunger tem den April 19, 2025 anepdang senden amenba sülen FIR magütsütsü lemtet. Tai tonglokja alisang ya police ket nung lir aser ozüing agi mela aliba ama tapet temerenshi agütsütsü imlar, ta SMO Tseminyu ajanga ashi.

BJP tasa tamajung lir, ola madokba ya tai maket masü: MP Gogoi

Guwahati, Rongchii/April 20 (Agencies): BJP MPs temi judiciary inyakyim nung mangatetep adoktsüsa sangdong agütsüba bhukuma BJP tir J.P Nadda-i jembiba atema Assam nungi Congress MP Gaurav Gogoi-i Deobarnü aitsü.

RSS-BJP alliance yagi mapang talangka nungi India ya authoritarian regime ka kumdaktsütsü aser North Korea aser Iraq den sako kumdaktsütsü meranger, ta Gogoi-i aitsü.

Osangbener den jembidang, BJP MPs Nishikant Dubey aser Dinesh Sharma nungeri Chief Justice of India anema jembiba

ya party ajanga nungloktsüba masü saka par tangatetba nung jembiba lir ta Nadda-i jangjashitsüba Gogoi-i aitsü.

Parnoki jebiba nung tepila mali aser judiciary nung nüburtemi tamang akaba samatsütsü asoshi teka amteper merangba lir, ta Gogoi-i ashi.

"BJP inyakyim, taslisa Ato Kilonser Narendra Modi aser Home Minister Amit Shah den tesendaktep junga alirtemi 'judicial independence' nung timtem agütsütsü atema inyaker amai ajiteter," ta Gogoi-i ashi.

Tamil Nadu sorkar aser Waqf Amendment Act dak sendakba nung Supreme Court ajanga obendang agütsüba nung BJP anisüngzüker manguba yagi parnoki judiciary tenüing tamajung agidaktsütsü merangba temaitsü sayur, ta pai ashi.

Nadda-i pa indang X (Twitter) handle nung MPs temi jembiba nung party shilem mali ta shia liasü.

"Judiciary aser Chief Justice



Gaurav Gogoi

dak sendakba nung BJP MP Nishikant Dubey aser Dinesh Sharma nungeri jembiba ya BJP den kecha nunga sendaktepa mali. Item ya par tangatetba lir. Yamala o BJP-i magizüker," ta pai zülua liasü.

Party indang jenjang akangshia, BJP-i teti judiciary akumtsüboa aru aser par obendang agizüker, ta Nadda-i ashi.

"Party ka ama onoki Supreme Court aser court ajunga asen democracy indang tongtipang tongshi aser Constitution anüker ama amanger," ta pai ashi.

Ajisüaka Gogoi yangji temulung masür. BJP-i tanen makai judiciary tenüing asenba yagi democratic yimya nung tetsükdaktsü bener arutsütsü merangba lir, ta paisa ashi.

"Ibai MPs anati pei tangatetba lemsatepba indang masü. Ibai 'authoritarian' tejangraba indang party tangatetba nung shilem ka lir," ta pai ashi.

Manipur police-i anogo 5 tsüngta auyaba gari 30 jungnua ngutet

Imphal, Rongchii/April 20 (Agencies): Tesüiba anogo pongu tsüngta Bharatiya Nyaya Sanhita (BNS) indang section balala kübok Manipur Police-i auyar aliba gari aika ngutet aser FIRs 30 shi süluokogo ta ashir.

Tesem balala nung tenük yoker operation agiba mapang item gari ya nguteta liasü.

Manipur Police-i anti-social elements/ mejangjaba nisungtem nungi auyaba/rakzükerba gari tem ngutettsü mechi special drive agidang April 18 nü tetsüng pezü aketba gari 14 nguteta liasü.

State telungzüker nung gari auyaba telok anema mera agia item gari ya ngutet. Police-i April 16 nü operation agiba mapang auyaba/rakzükerba gari 15 (tetsüng pezü aketba gari 9 aser tetsüng ana aketba gari 6) nguteta liasü.

BNS ozüing kübok aibelener asoshi temerenshi tuluba agütsütsü renemba sülen

auyaba osang angazükli bushisüngdang temi tesem tonga oa mapa tamajung atalokdak video tangoka osangtem police indang X nung lemsateper, ta ashi.

Police temi April 16 aser 18 tsüngta state telungzüker nung gari auyaba puaka, nisungbo kata mapu.

Item gang züngsetem tang tashi jenshia senzür, saka police temi parnok aputsü asoshi tasa balala yanglutar.

Police temi ashiba agi, item mapa tamajung inyaker temi teti nunga Manipur tesem balala nung mela-mela auyatsüba tesem aser ki nung tenük yoker aser SUVs, jenjang tulu aketba gari aser tetsüng ana aketba gari tem auyar.

Iba mapang parnok ket nungi gari 30 shi ngutet.

Northeast India aser Myanmar nung kasa mapa inyaker temi meshiba ama parnok SUVs aser jenjang tulu aketba gari tem auyar.



April 20, 2025 nü New Delhi nung Delhi Chief Minister, Rekha Gupta-i yimti nung tzü supply agütsütsü atema tzü abenba tankers 1,111 tenzüksüdang tangokba noksa nung angur.

Madhya Pradesh nung doctor kati tambur ka dak azük

Bhopal, April 20 (Agencies): Madhya Pradesh state nung Chhatarpur district hospital nung doctor kati arrshi küm 70 tambur ka dak azükba osang temai adokogo.

Taoba Brihostibarnü doctor jagi tambusang dakji azükba sülen doctor anema FIR ka benokogo aser senior health official ka jaok.

Doctor jagi tambusang dakji maaoktsü aser atem nung atsüer aoba sülen hospital nung aliba police post nung pua ayutsü, ta amokmerena liasü.

April 17 nü atalokbaji nisung kati phone nung tangokba sülen social media nung prokshi.

Arrshi küm 70 tambur, Udhav Singh Joshi-i pa kinüngtsü temang mejungi

hospital jagi anir oa liasü. Parnok tarensena nokdaka lia ajungbena doctor, Rahjesh Mishra arua parnok dang, nenok kechiba tarensena nokdaker? ta asüngdanga liasü.

Ajioda Joshi-i langzüksü merandang Dr. Mishra-i pa dak maaoktsü. Iba sülen doctor den senior health official ka nati pa atsüer ao.

Iba tatalokba dak sendakba nung health department-i Mishra dang ghonda 24 tsüngda telangzüba agüjang, ta tuyu aser Naugaon police station nung FIR ka benok. Tesülen iba FIR ji Chhattarpur nung aliba Kotwali police station-i belen.

Kasa hospital nung Dr Ahirwar-i, "Mezüngbo doctor-i, tambusang jagi tim mesüi

benshi ta ashi. Ajisüaka video noksa apibo doctor-i inyakba mapaji tagizüktetla masü aser maaoktsü mapa lir. Onoki departmental ajanga bushisüngdangtsü tuyuogo," ta metetdaksü.

Ano külen District collector Parth Jaiswal-i, "Dr Ahirwar dang ghonda 24 tsüngda telangzüba agüjang ta tuyu. Iba tatalokba bushisüngdangtsü atema Sub Divisional Magistrate (SDM) leniba nung züngsem asemi akümba committee ka tentet aser parnoki report agütsüogo. Iba report nungji ajemdaker doctor nem temerenshi agütsütsü atema health department matsüngdang benokogo," ta metetdaksü.

Delhi nung ki chirepba lendong nung nisung 11 asü

New Delhi, April 20 (Agencies): Delhi kübok Mustafabad kiyong nung ki ka chirepba lendong nung nisung 11 asü aser nisung aika anenbanga lir.

National Disaster Response Force (NDRF) aser police-i ashiba agi, ki chirepba jana jagi nisung aika rembanga liasü. Tang tashi nung nisung 15 kümzüka GTB Hospital-i anir ao saka nisung karbo süadok.

Osangbenertem den jembidang North East District

Additional DCP, Sandeep Lama-i, pezüben amentepa asüba kiji ayaterm nung chirepa liasü, ta metetdaksü.

Ki chirepba sülen National Disaster Response Force (NDRF), Delhi Fire Services (DFS) aser ambulance services iba tesemji tonga ao, ta paisha metetdaksü. Iba tatalokba bushisüngdangtsü atema Delhi Chief Minister Rekha Gupta-i tetuyuba agütsü aser yirua alirtem tajungtiba nung anepalutsü tuyu.

Chief Minister-i, "Mustafabad nung ki chirepba osang angashia jashir. Iba tatalokba bushisüngdangtsü tuyuogo aser aibelener nem temerenshi tulu agütsütsü," ta metetdaksü.

Laisa, "Iba tatalokba nung asürtem atema ni mangyim jashi lemsateper. Tsüngremi asürtem tanela tesünap nung anisüngzükdakjang aser mangyimer kibongtem nem tashi agüjang ta sarasademtsür," ta lemsatep.



April 20, 2025 nü Easter Sunday anogomong nung Chhattisgarh state kübok Bastar nung Khristantemi kinüngertem leper semdangba noksa nung angur.

AO OSHI NUNG KAKET ZÜLURTEM ATEMA SHISAMOLU SENTONG

Tayonger : Ao Riju
Anogo : Rongchii 26, 2025
Tesentepdak : Aor Kilem

MEZÜNG SENTONG : 10:00 Ako nungi

1. Sentongnir : **Wt. Repabenla**, Assistant Professor
Ao Department, FAC
2. Sarasademtsü : **Wb. Matsüing Longkumer**
Asst. Pastor
Süngkomen Baptist Arogo
3. Okila : **Wb. S. Wati Ozüküm**
Tongti Zülur, Ao Riju
4. Tayongzükbba O : **Wb. Marsanen Imsong**
Tir, Ao Senden (10 mins)
5. **Ao Oshi Tamentakdak Kimung aser Lirumedem** (30 mins)
Tejembir : **Wb. I. Temjen Tzüdír**
P/ Head, Ao Riju
6. **Kaket Zülutsü Yayim aser Nüngdakbatem** (30 mins)
Tejembir : **Padmashree T. Senka Ao**

TANABUBA SENTONG : 1:00 Ako nungi

O Lemtep Mapang Onir:

Wb. Limalenden Longkumer
Editor, Mokokchung Times

Züluyur:

Wt. Toshisangla, Assistant Professor
HoD, Ao Department, FAC

Wt. Asapokla Imsong, Assistant Professor
Ao Department, FAC

CHIYUNGBA MAPANG

Temetettsü:

1. Iba Sentong nung item nungi medema arua dendaktsünür:
i) Ao Senden ii) Watsü Mungdang iii) AKM iv) ABAM Literature & Education Luden, v) Arogo Osang Kaket Zülur Luden-tem, vi) Osang Kaket Zülurtem, vii) Aor Kaket Zülur viii) Ao Ken Mejemer aser Atener, ix) Ao Oshi Lushi balala nung zülutsü jangrartem.
2. Sentong nung shilem agir ajak nem Kulikaket agütsütsü.
3. Iba Sentong nung ajaki asen sobaliba sobutsü sobur arudaktsünür.
4. Sentong nung adener ajak nüngzüluok (registration) 9:30 ako nungi tenzüksü.

Taruba hopta PM Modi-i Saudi Arabia semdangtsü

New Delhi, April 20 (Agencies): Taruba hopta Ato kilonser Narendra Modi-i Saudi Arabia semdangba mapang nung pai Jeddah nung factory ka semdanga yangji mapa inyaker India nungertem ajurua jembitsü, ta Foreign Secretary Vikram Misri-i metetdaksü.

April 22-23 anogotem nung Ato kilonser Modi-i Saudi Arabia semdangtsü.

Misri-i, "Alima nung India nunger nütsüng teimtiba aliba tanabuba linükji Saudi Arabia lir. India nunger million 2.7 jungnüa Saudi Arabia nung alir aser mapa inyaker. Saudi Arabia nung India nungertemi iba linük aser rongsenkettzüng terenlok nung shilem tajung agiba züngshiba ajanga onok melung asür," ta metetdaksü.

Jeddah nung aliba factory semdanga India nungertem ajurubaji ajanga Ato kilonseri bendanglen mapa inyaker India nungertem atema bilemtsüba sayur, ta pai ashi.

Foreign Secretary Misri-isa, küm shia Haj aser Umrah temeshi aini aotsü atema Saudi Arabia-i India nunger temeshi aini aor meyrjang aika tajungtiba nung anepalur, ta metetdaksü.

Paisa, India aser Saudi Arabia na tsüngda tesendaktep tsütsü küm shia temeshi aini aoba Haj aser Umrah ya kanga tongtibang, ta metetdaksü.

Haj temeshi aini aotsü atema

India nem temeshi aini aoter 175,025 lemküksür.

Saudi Arabia nung India nunger million 2.7 lir aser Saudi Arabia nunger rongsenkettzüng ainba nung yangji aliba India nungertemi shilem tulu agir.

Yaküm December ita nunga Ato kilonser Modi-i Mina Abdullah, Kuwait nung labour camp ka semdanga liasü. Iba camp nung mapa inyaker 1,500 bo India nungertem lir.

Ato kilonseri Kuwait mezüng semdangba mapang nung India kübok state balala nungi yangji oa mapa inyaker ajurua liasü.

Tesüiba küm ishika tsüngda India sorkari bendanglen mapa inyaker India nungertem taküm jenjang tajungba akümtsü atema E-Migrate portal aser MADAD portal tenzük aser Pravasi Bharatiya Bima Yojana jenjang ajungketja liasü.

Taküm January ita nung 18buba Pravasi Bharatiya Divas convention tenzüksüdang Ato kilonser Modi-i, bendanglen aliba India nungertem ya India atema ambassadors lir, ta metetdakja liasü.

Modi-isa, tesüiba küm 10 tsüngda pai linük balala nungi lenirtem ajuruba mapang nung lenirtemi par linüktem nung India nungertemi shilem tajung agiba atema tenünsang agütsü, ta metetdakja liasü.



TIR YIMYIM YIMOBILEM (EDITORIAL)

DIMAPUR MONDAY, APRIL (RONGCHII) 21, 2025

Asüngbo Robot den inyaktsü !

Alinüyonga malinüyonga asenoki aginer aser tenüngdaka nüngdaker, anungji asenok tuluba nungi tilatiba tashi agi süoshi nungi shir electronic oset smart phone tashi China nung China nungertemi yangluba alia amshir. Itemji bilemdangdang, asenok Naga nungertem ya India kübok masü saka China kübok alinunga tang asenoki bilemba , angatetba aser inyakba kolok dang nungi tajungba aser techiraba kümer, tang alima ajunga nung amshiba osettem nung “Made in China” ta alibatem rongnungji asenok kolok aser teka agi yangluba karbo lila asü melila ta bilemer. Atangji, yimten yimsüsüba tashi aser inyakyim agi dang nübertem anir asünungji, asenoka China nungur aküm nungbo meinyaknyüonga inyakla ta bilemer. Aji oda, asenok tia majung, yimtenbo India kübok saka India nungertemi asenok ya India nungertema ta mamanger aser asenokia India nungur ama mapa inyaka meliteter ta tetsüngda nung, tang amai asenoki mapa ajak tiyazü aser taila nung dang tasüa masü taküma masü, teinyaker-a masü meinyaker-a masü, kodang chireptsüar memetetba ki ka nung tanüa tanü boksüng asoshi raratepa alir amai alir. Iba amai alidang, asenoka kecha tasenka meinyaktetyonga, putu yimya den sütepa alitsü bilema Smart Phone amshiba amai, asenok nüngdak nung amshitsü asoshi China nung yangluba Robot alitsüsa akümtsü. Joko, nisungtemi inyaka aruba mapatem Industry aser aluyimba nung dang masü saka ki mapa nung dena nisung melen ‘Humanoid Robot’ amshitsüba mapang anasai arur. Küm aikabo mao, asenok tsüraburtem mapangbo kidang kibong nung tanur tuku ter tashi sodden yonga tanur reprangtsü tangar anir arua kilia mayu saka tanübo kidang kibong nung kilir mali asenok aikati meliteter aser yunüyonga kilirsa alitsü nübo mangur. Iba nüngdak ya asen lima nung memenui nisung mesüka yangluba Humanoid Robot-tem agi melentsü. Aji oda, kisüjensü dak aser factory nung nisung masü Robot-temi inyaktsü, alua Robot-temi inyaktsütsü aser kidang asen ausodena Robot-i shitoktsütsü. Ibaji hau ta asütsüsa, yakanü China yimtiba Beijing nung Robot-tem Half- Maraton, aji kilometer 21 asemtepba saisapong sentong ka nung Robot ajak agi 20 shilem agia asemtepogo. Iba asemtepba nung ya karaa asemtetbaji dang masü saka tashi aitba, topur ajungba aser shilem junga agitetba nung takoker sempet agüja liasü. Item asemteperitem rongnung Tiangong Ultra-i ghonda 2 ser minute 40 nung kilometer 21 asemtepba alizüngji tongtetba mezüng takok jenjang angu. Ibai alima nung nisungtem inyakyim nung temelenshi tulu tenzüksü asoshi asemtepa sayuba mapa ka lir, kechiyong Robot asemtepdaktsübaji asenok pelateptsü asoshi ayongzükbba benjong sentong amato masü, saka nisungtem mapa nung anioka amshitsü asoshi tendangba mapa ka lir. Asemteper asünungji, lenmang atang aser lenden meteta asemtsü aser lenku paitsü, anungji shitakba nisung amato tokolok amshia asemtsüla aser iba amaji asemtetra tanga meimchirtem nüngdak nunga shitak amshitettsü. Iba nüngdak atemaji China nungertemi nisung melen nisung amai inyaktsü asoshi Robot yanglur. Aji oda, joko tanü lima nung ya tangarbo taila rongsen agi taila taküm alitsü merangteper masü saka kodaser mapa tuluba, tezübaba aser tajungba inyaktsü ta asüba nung tokolok belemer. Iba amaji bilema-bilema joko gari lenmang malidak nisungtem nüngdak ajak ‘Drone’ agi tongtsü tenzükgogo aser asüng asen lima sünga asenok mapa inyakdak China nungertem dang nungi aliba Robot agi asüngtsü. Iba ama mapang nenjunga arudang, asenok anisüngzüka kazütsüba mapang masü saka joko asenoki meyanglutetyonga Drone aser Robot-ji amshitettsüsabo asenok dak temetetba aser tangatetba alitsüsa asenok renemtsüla. Joko, tazüngertema ‘degree’ angutsü kisüng bilema azüngtsüba putu masü aser academic degree ka angutsü asoshi akhidang ama küm aika endoka azüngtsüa menüngdaker. Joko, tanübo asüng asoshi bilema robot den külemi mapa inyaktsü renemtsü rongdak nüngdakang tongtibangba kümogo.

OLEMSABANG

LOKILIBA YA SHIRNOKI RAKSAR ASER SHIRNOKI YANGLUR ?

~ L. Kika Pongener.

(Yashi adok nungi...)

Kechiyung lokti nung ochishir dena alibajagi ochimashirtem ochimashi mapa inyaktsü mesademer. Kanga tesasatsüka, tanü putu nung asen lokti nung lennir aikati pei sunutsü sua loktiji anishitsü bilemba agi, tajung-majung ajak nung ola madoki hau-hai ta tashi angaa, tekong angumdena anidaktsüpur dang tenzükdaktsünur. Iba ama tentet tamajung ka jagi tanü asen lokti alener rajang kümdaktsür.

Tashitemeteteri ashiba ama....Loktiliba raksadaktsüba ya, ochimashir aser nisung tamajungeri raksaba dang nungibo....Ochishir tangateter, teindang nisung tajung shirnoki majunga tabo metet, meshitaka tabo angatet, tim masüa tabo ajitet....Saka nungsen tsübuba agi ola madoki yutsür....Parnok jagi loktiji tuluba raksatsür. Atangji, loktiliba raksadaktsübaji mapa tamajung inyakba aser aibelena inyakba anema nungsen tsübua ola madoki toktsüba agi tuluba raksatsür. Ano lokti raksaba kuli tamajungtiba kaji.... Lokti nung ketdangpurtemi külem tenzüker den mangatettepi aser külem tenzüker nungi shisatsü magi-i pei mulongba agi telemtetba agiba agi lokti raksatsür. Ano loktiliba raksaba kuli kaji....Aibelener dang aibelenogo ta shia arrtsüa tenarong mesuka merenshitsü melena....Tejak apayua aibelenogo ta meshiteti mimbanga yutsüba agi raksadaktsür. Ano loktiliba raksadaktsüba kuli kaji....Ken o tila-teri ajak nung telok-telok telung dener tepo kümtepbba, ozü telok aser par telok ta tepo kümtepbba....Iba ama tentet ya ajak dang tamajungtiba asütsü.... Ano kangasa tamajungtiba kaji....Telok kar tashi ammer ochi ola madokdaktsüi/mejembidaktsüi temzüng-ozüng agi amokmerena nemdema/songdema ayuba iba amala tenet tamajung agi lokti kaji raksadaktsür.

Anungji asen loktiliba yanglushitsü aser tejakleni aotsü atema tangateter ajaki nungsen metsübui tasü-ita ochi jembitsüla, ochi ola adoktsüla aser yimjak nung ochi yimyim ayimtsüla. Tim masüba nungpo indang-indanga yabo tim masüa ta shitettsüla. Osangkaket nunga alima aser loktiliba ajungtsü asoshi tasü-ita pei tebilemba lemsatapa ocet zülutsüla. Asen lokti ajungtsü aser melenshitsü asoshi nungsen metsübui aibelener dangpo aibelenogo ta indang-indanga shitettsüla aser tasü-ita metongshitsütsüla. Atangji, tanü asen loktiliba raksadaktsüba ya mangateter, ochimashir aser nisung tamajungertemi raksaba dang nungibo....Nisung tajung, tangateter, ochishir, tashitemeteter, shirnoki meshitaka/majunga tabo meteter/ajitet sernung, nungsen tsübuba agi memetet/majitet amai ola madoki toktsür parnok jagi tuluba raksadaktsür. Anungji asenoki tasü-ita ochi nung marakzüi nokdakdi aser ochi jembir, ochi ola adoker aser ochi yimyim ayimoktsür ka-ka sudi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

Israel sepaitemi Palestine nunger Khristantem dak azük



April 19, 2025 nü Yirusalem nung aliba Holy Sepulchre Tenla kidang Khristantemi candle tsükloker 'Holy Fire' sentong nung shilem agiba noksa nung angur.

April 20, 2025: April 19, 2025 (Holy Saturday) nü Jerusalem nung Holy Sepulchre Tenla ki semdanger Palestine nunger Khristantem dak sepaitemi teka sangshi.

Easter amongtsü atema Jerusalem-i arurtem meyrjang aika Israel sepaitemi nokdanga liasü.

Osangbener den jembidang Holy Sepulchre Tenla ki jabi amsang Adeeb Joudeh Al-Husseini-i, Israel sepaitemi Tenla ki semdangertem aser tekülemertem meindokba dang masü saka iba Tenla ki semdangtsü atema 'special permit' alirtem-a meindok, ta metetdaksü.

Khristantemi Good Friday aser Easter Sunday na tsüngda 'Holy Saturday' amonger.

Holy Sepulchre Tenla ki ya anüdoklen Yirusalem nung lir, aser iba Tenla ki asüba tesem ya Yisu Kangki nung metaba, aremba aser tasü nungi shia aruba tesem lir, ta Khristantemi amanger.

A l - H u s s e i n i - i , "Tamangertem aser temeshi ainlen jajartem metetsümonga

mezüngmeshiba ya ataloka arudar. Iba ya pei yimsü sademsadema benshitsü temeden anema inyakba lir. Sepaitemi Holy Sepulchre Tenla ki tsütsüleni aoba lenmangtem nokdang aser Khristantem atema temeshi anogotem nung iba Tenla ki semdangtsü memela," ta ashi.

Paisa, "Temeshi ainlen jajar Khristantem anema inyakba ya kanga majung," ta ashi.

Easter atongtsü mapang anasa Israel sepaitemi Yirusalem yimti tejenba meketa security akangshi, checkpoints amenok, tamangertem aser temeshi ainlen jajartem amokmeren aser Holy Sepulchre Tenla ki semdangtsü atema arur Palestine nunger Khristantem meyrjang aika nokdanga liasü.

Hopta ka tejaklen nungi (Palm Sunday) West Bank nung alir Khristantem Jerusalem-i aotsü memela aser Good Friday anogo nunga Yirusalem nung Khristantem atema temeshi tesemtem semdangtsü atema memelai liasü.

Palestine nunger activist,

George Sahar-i, Honibarnü Khristantem dak teka sangshiba ya 1967 küm Arab-Israel War sülen tatalokba tamajungtiba lir, ta ashi.

Sahar-isa, Holy Sepulchre Tenla ki tsütsüleni aoba lenmangtem aser yimti tejenba tsütsüleni aoba lenmangtem nokdanga checkpoints amenokba ajanga nisung jenti ghonda aika timtema ataogo, ta metetdaksü.

"Tang Khristantem anema inyakba ya Ramadan mapang nung Muslim nunger adianutem anema inyakba den kasa lir. Ramadan mapang nung Muslim nungertema Al-Aqsa Mosque-i aotsü nokdanga liasü," ta paisa metetdaksü.

Sahar-i, Yirusalem nung Khristantem aser Muslim nunger naprong yimsü temeden nokdangtsü atema asalentong yanglua inyaker, aser takümsa tamajungba liasü, ta ashi.

Paisa linük balala, Arogotem aser meimchir temeden atema inyakba organisations dang tiyongtsüi aita inyaksü ayongzük.

Pakistan nung Khristan kati tasüba temerenshi anema temepishiba agütsütsü

April 20, 2025: Pakistan kübok Jaranwala jila nung Tsüngrem mezüngmeshiba ozüng kübok aija Khristan ka nem tasüba temerenshi obendang agütsüogo.

Anti-terrorism court kati Khristan ka nem tasüba temerenshi obendang agütsüba sülen pa atema ken o jembitsür lawyer kati, tasüba temerenshi obendang anema High court nem temepishiba ken o agütsütsü, ta metetdaksü.

Arrshi küm 36 Khristan jagi Muslim nunger temeshi kaket Quran shisatsü, ta pa nem tai tonglojka liasü.

2023 küm iba dak sendakba ken o nung Jaranwala nung Muslim nunger lokti tulu kati Tenla ki aika rongdoktsü aser Khristantem meyong ki noklang aika rongdokja liasü.

Good Friday nü anti-terrorism court kati Khristan ka nem tasüba temerenshi obendang agütsüba sülen anogo ka lir April 19, 2025 nü osangbenertem den jembidang Khristan atema ken o jembitsür lawyer Akmal Bhatti-i, "Iba obendang anema onoki High Court nem temepishiba ken o agütsütsü," ta metetdaksü.

Pakistan nung Tsüngrem

mezüngmeshiba/atalaba ken o nung aitsürtem nem tasüba temerenshi obendang agütsür, saka tang tashi nungbo shinga nem-a tasüba temerenshi magütsü. Ajisüaka item ama ken o dak sendakba nung loktii azükba mesüra nisung tepsetba tatalokbatembo aika lir.

Good Friday nü Karachi yimti nunga lokti tulu kati arrshi küm 47 Ahmadi nunger ka zükseta liasü. Pakistan nung Ahmadi nungertem ya-a nütsüng ajema alirtem lir. Orthodox Muslim nunger kari pa Tsüngrem mezüngmeshiogo, ta tai tongloksüba sülen loktii pa zükset.

ANOGO ABEN TSÜNGREM DEN

Tsüngrem Ne Den Lir

Yamai temeranger Kibubai ashir: "Item anogo nung ya oda ataloktsü, kintem oshi ajak nungi nisung teri Yihuda nunger ka dak sü nung sotter ashitsü, onok nenok den aotsü, kechiyong Tsüngrem nenok den lir ta onoki angashiogo. Zak. 8:23.

Tsüngremi Pa nüburtem Tanela Temeshi agi sünga lidaktsüner idangji tangari Pa ain parnok dak aliba metettsü.

Ainkar Zakaria ajanga, Tsüngremi Pa nüburten dang parnok pa atenba balaka sayutsüla ta ashi. Tsüngremer nüburi Pa anasa jajara, alima ajungai parnoki Tsüngrem metetta lir ta metettsü. Nüburi Tsüngrem chir ka ngura, parnoki pa/la den alitsü yongyatsü kechiaser yamaji aliba ajanga parnoka Tsüngrem anasa alitsü ta parnoki bilemstsü. Tekong 20 nungi 22 tashi nung kintem teyongya alidang ainkari ashir.

Tangar ne tsütsüi anir arutsüsa Khrista akaba kuli ne taküm nung alitsüla. Parnoki parnok chirtem ne chirtem den lidaktsünütsü kechiaser ner chirtem Tsüngrem metetba nung indaktsü. Mapa agütsürtemi na parnok mapa nung anioktsütsü, aser tanishir südaktsünütsü kechiaser parnoki na Tsüngrem den tsüngchir süa aliba metet. Ne taküm aser kibong tangar atsüa aruba tashi (magnetic) ka ama alitsüla. Parnoki ne den aser ner kibong nung Tsüngrem dena lir ta bilemba ama ne taküm aser kibong alitsüla. Nai Khrista ne den aliba kuli tali sayuli, nüburtem tali Pa dangi atsür aruli ta asütsü.

Chhattisgarh nung yimdak nungi meindokba Khristantem kidangi shilangogo

April 20, 2025: Tawa nokdanga liasü.

Chhattisgarh state kübok Karigundam yimdak nungi Khristan kibong trok yimdak nungi meindoka liasü, ajisüaka sorkar ketdangsertem tiyongtsüi ia inyakba sülen parnok kidangi tanaben meyipa aruogo.

April 12, 2025 nü yim 9 nungi yimdak 400 Karigundam yimdak adenshia senden amenba sülen village council-i Khristan kibong 13 ji yimdak nungi meindoktsü telemtetba agia liasü, ajisüaka Khristan kibong tenetibo akhi tribal yimsü dangi meyiptsü melunga liasü.

Tesüsa tanüngba Khristan kibong trokji yimdak nungi meindok.

Butar Singa, Poonem Mutta, Gaddam Veera, Kadati Baalraj, Kadati Linga, Kako Rama aser Kunjam Sammi nunger leniba nung Khristan kibong trok jagibo yimdak nungi meindokyonga parnoki Khristan yimsü metoktsütsü ta ashi.

Iba sülen yimdaklirtemi kibong trok osettsüset ajak tractors nung oshikettsüba sülen yimdak nungi meindok. Khristan kibongtemji anogo ishika arem nung kanga timtema liogo.

April 13 nü Central Reserve Police Force (CRPF) sepaitem aserl police-i Khristan kibong trokji yimdaki anir arutsü merang saka yimdaklirtem jagi

Tesüsa local administration, police aser CRPF sepaitemi Khristan kibong trokji yimdaki anir aruja liasü.

Osang angazükba agi, sorkar ketdangsertem jagi yimdaklirtem dang linük temzüng nung agüja aliba temeden balala angatetdaksü, aser tarutsü nungbo yamaji teinyak, ta tekümdangtsü metetdakja liasü.

Iba yimdak Khristantem jagi küm tenet tejaklen Khristan yimsü agizüka liasü. Tribal nütsüng teimba aliba yimdakji kibong 136 aser nütsüng 661 lir.

Yimdak tongti yimsüsür (sarpanch)-i, yimdak sobaliba aser telongjem wazüka ayutsü nükjidong nung village council-i India temzüng kübok Arrla 243(A) nung agüja aliba tashi amshia Khristantem meindoktsü telemtetba agi, ta metetdaksü.

Ajisüaka sorkar ketdangsertemi yimdaklirtem dang, India temzüng kübok senso ajak nem yimsü temeden agüja lir, anungji nenoki inyakbaji linük temzüng alema lir, ta angatetdakja liasü.

Tawa Chhattisgarh Christian Forum (CCF)-i, state Chief Minister Vishnu Sai-i, Khristantemi ozüng alema yimsü meyipdaksür ta tia tongloksü, ajisüaka pai Khristantem anema item kuliji magütsütet, ta ashi.

AO OSHI ANGAZÜKDAK:**TANÜ ANGAZÜKTSÜBA OJANG****Temenushitsü**

(n) alu aser tagitsü bendendak anünga toktsübatem (leftovers)

* Alu ruzüker pentsü nung temenushitsü aika adoker.

Temepo

(n) tetsüing nung ali nung ajemdaklen (Sole of a person's foot)

* Tsüingsem masem temepo agi ali nung khenkhenbo jajatsüla.



Tir Yimyim

OLONG PAITEP # 7128

	1		2			3		4		5
6								7		
					8		9			
			10							
11										
				12						
13		14		15						16
17										18

TIPIEN

1. Inyaker ajangtetba - (3)
3. Bangsemo adokdak - (5)
6. Shitak mesüi inyak - (7)
7. Ya mimong nung angur - (3)
9. Reprangzüik - (4)
10. Tasola - (5)
11. S ____ - (4)
13. Yagi ajak ashioktsür - (3)
15. Ki aokba oset - (7)
17. Ak shi nung inokba tasen - (5)
18. Ishika - (3)

LANGTSÜNGLEN

1. Meshidak - (3)
2. Tanaben soshir - (7)
3. Iba anogo - (4)
4. Meshi - (3)
5. Yagi mi tsükloker - (9)
6. Shi tapu ka - (9)
8. Yagi ayimer saka ozü masü - (3)
9. Ajokba shiruru ka - (7)
12. Inyaktet - (4)
14. ____ hi - (3)
16. Akümli nungi pilar - (3)

OLONG PAITEP # 7127 TELANGZÜBA**TIPIEN :**

1. Telok, 4. Aluru, 6. Ozüing,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

1. Tenükjang, 2. Luden, 3. Kioktsü,
5. Lenti, 7. Tajangzüik, 11. teronem,
12. Sempa, 13. Jahaz.



Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Happy Birthday**TENÜING : TEMSUMEN JAMIR**

Tasoba anogo : April 21

Küm : 9

School : Mezbur Higher

Secondary School

Talidak : Lower PWD, Kohima

Tanü na iba anogo nung küm 9 ajungba atema pelaba salem abener. Ne taküm maneni Tsüingremi ano moajang ma!!!

~ Temeim Tsürabur

**Bhutan Chuba Wangchuk-i Assam nung mapatong balala reprang****Guwahati, April 20, 2025****(Agencies):** Bhutan Chuba Jigme Khesar Namgyel Wangchuk-i Assam kübok Bongaigaon district

semdangogo.

Honibarnü Wangchuk-i under-construction international multimodal logistics park aser Jogighop nung tawa lapokba inland water transport (IWT) terminal reprangdanga senzü.

Item mapatong ya India-Bhutan arrtsü anasa yanglur aser Bhutan rongsenketzüing atema kanga tongtipang ta züingshir.

Iba logistics park ya Bharatmala project nung shilem ka lir aser Brahmaputra River anasa yanglur. IWT terminal ya

February 18 nü lapok aser Bhutan Chuba-i iba ya tongti süa semdangogo.

"Bhutan Chubai semdangba ya India aser Bhutan tsüingda mapang talangka tesentaktep aliba akangshir" ta Union Shipping Minister Sarbananda Sonowal-i ashi.

Item mapatong ya Prime Minister Narendra Modi'er Act East policy den putepa lir aser regional growth & sustainable development atema nükjidong lir ta Sonowal-isa metetdaksü.

Assam Chief Minister Himanta Biswa Sarma-ia item mapatong ajanga region melenshitsü aser Bhutan nung Gelephu Mindfulness City development nungittsü ta

ashi.

Assam Public Health and Engineering Minister Jayanta Malla Baruah-i logistics park nung Bhutan Chuba Wangchuk pelaa agizüka liasü.

Iba park ya NHIDCL ajanga yanglur aser iba nung road, rail, air, aser waterways sendakteptsü ta Baruah-i ashi.

Iba park ya Brahmaputra anasa ali acre 317 nung yanglur aser Bhutan o Bangladesh den shishilembaba ajanga Assam rongsenketzüing renloktsü imlar.

IWT terminal ya Rs 82 crores endoka yanglu aser kümshia cargo 1.1 million tones tashi amshitettsü.

Manipur ex CM N Biren Singh-i hill district atema tebilemstsü abener**Imphal, April 20, 2025**

(Agencies): Manipur kübok hill district pezü- Jiribam, Senapati, Kamjong, aser Ukhrul nung lenmang yanglutsü atema senotsü ajema agütsüba atema taoba Manipur Chief Minister N Biren Singh-i tebilemstsü lemsatepogo.

Item district pezü yagi Myanmar, Assam, aser Nagaland den arrtsütepa lir.

"District pezü nung contractor temi senotsü kanga ajema agütsür aser iba ajanga infrastructure quality nung kongshitsü" ta Biren-i ashi.

Pa ya Manipur Pradesh BJP nung tongtipang lennir tejen ka lir aser senotsü dalang agütsüba ajanga border district tem nung terenlok mapa inyakba nung timtem ajurutsü ta pai ashi.

"Mapang shia asenok dang nisung kari dang state ajunga renloktsü atema nendaka inyakba sayua arur. Ni maneni valley nung mapa tajungba aser hills nung mapa shitak meinyakba indang nenshir" ta Biren-isa ashi.

Hill district tem nung contractor temi departmental estimates dang nungi kanga teküpokba jenjang ataker, ta

paise shisem.

Cement concrete road atema estimated cost ji Rs 100 lir saka contractor temi Rs 64-68 tashi ajema agütsür aser iba ajanga lenmang tajung meyanglutettsü ta Biren-isa metetdaksü.

Biren Singh-isa data lemsatepba nung Jiribam: 32% (below the scheduled rate), Senapati: 33% below, Kamjong: 32.56% below aser Ukhrul: 36.48% below ta sayua lir.

"Iba jenjang ya asenoki sen endokba ajemba masü saka infrastructure tarutsü raksatsür" ta Biren-isa ashi.

Assam Police-i Manipur PLA tanishir ka apu**Guwahati, April 20, 2025**

(Agencies): Manipur nung People's Liberation Army (PLA) züingsem ka Guwahati kübok Paltan Bazar nung apu.

Iba nisung ya Mayanglambam Bobby Singh (31) ta jangjaogo aser pa ya Kakching district nungi lir. Guwahati nung hotel ka nung

pa apu.

Osang tejangja ka angazükba sülen Basistha Police, Special Operations Group (SOG), aser Paltan Bazar Police nungi telok kati mita aodang Singh apu.

Singh-i ozüing alema mapa inyakba aika nung shilem agia lir aser PLA indang

tongtipang nisung ka lir ta Deputy Commissioner of Police (DCP) East, Mrinal Deka-i ashi.

Police-i pa ket nungi electronic gadgets aser taittsü aketba kulikaket aika ngutetogo. Pa ya tang Basistha Police Station nung yua lir aser Manipur Police ket nung agütsütsü imlar.

OFFICE OF THE
UNGMA BAPTIST AROGO
LAISHIR TELONGJEM (UBALT)

Temeim Laishirtem, taküm 18 BUBA Ungma Baptist Arogo Laishir Telongjem INTI - MUNGDANG May 3rd - 4th 2025 nung lir. Ajak-i sentong (program) mangutsü akok, saka iba sangdong ajanga Laishir züngsem ajak arua iba sentong nung adentsü office ajanga sarasadema ayongzüker.

Sd/-
Limanungsang Jamir
President, UBALT

Sd/-
K.Anungla Longkumer
Secretary, UBALT

ALI TAYOKTSÜ LIR

1. 3 Pura. Foothill road tangshia 150 per sq.ft
2. Foothill anasa teak lu, 120 per sq.ft
3. Showuba fly over anasa 190 / 250 / 310 per sq.ft
~ Contact : 9863826159

ALI TAYOKTSÜ LIR

Aoyimti road touch, Highway nungi feet 500 yir. (left side)
@ 730/- Per sq.ft.
Contact: 6009905256

Putin-i 'Easer truce' nangzükaka maneni amaker: Zelenskyy

Kyiv, Rongchii/April 20 (Agencies): Russia-i ceasefire alir ama sayuer Ukraine tesem kar nung maneni amaker, ta Ukraine Tir Volodymyr Zelenskyy-i tai tonglochtsü.

Russia Tir Vladimir Putin-i tuyuba ama "Easter truce" tenzüker ghonda trok tsüngta Russian sepaitemi injang-bomb tulu 387 ben amshi aser 19 ben amak aser drones 290 ben amshi, ta Zelenskyy-i ashi. Ajisüaka asü-amaba osangbo mali.

Putin-i par sepaitem dang Ukraine nung Honibar nikongdang 6:00 ako (par mapang) nungi Deobar ayatirm tashi mitkar inyakyim ajunga anentsü totuyuba agütsü. Kyiv-ia yamaji inyaktsü ta ashi.

Russia indang defence ministry-ibo Russian sepai ajungai iba truce sülen anidaker saka Ukraine army temi iba truce raksar ta aitsü.

Ukraine units temi Russian sepaitem alidak 444 ben khaloktsü, unmanned aerial vehicles (UAV) amshia 900 ben amak, injang-bomb tulu amshia 12 ben amak, UAV agi 33 ben amak aser injang-bomb tenet tsükdaktsü, ta Russia-i ashi. Civilian tem asüba aser yiruba lir ta ministry-i ashi saka osang tejangja magütsü.

Deobarnü Zelenskyy-i ashiba agi, Moscow yagi ceasefire ali ama sayutsü meranger saka tesem kar nung maneni amaker aser Ukraine nem takoksa agütsür.

Russia indang mitkar inyakyim aija, asen nokinketer temi tesem ajaklen tsükchir dak alang telangzüba agütsür, ta Zelenskyy-isa ashi.

Putin-i ceasefire ya tenzüktsü minute ishika lia sangdong asünung itangjisa rara anentsü yabo tamakoktsü, saka front lines nung süngjemba indang Ukraine nungi BBC ajanga

ashi.

Tesem kar nung maneni amaker ta Zelenskyy-i mashidang, Honibar aonung ayatirm mapang Ukraine anünglen Russian drones mesüra fighter jets aliba osang meliasü. Aser yamaji aiben majurur.

Black Sea nung missile launchers aliba Russia nunger rong ka yoka lir ta osang ka dang liasü.

Ukraine south tsütsü Odesa yimti nunga süngjema liasü. Moscow-i iba osang mesangdong dang Hukulbar aonung tepiyong Russian drones tem Crimea tsütsülen tesem ajunga nungi yoka liasü.

Honibar aonung iba truce tenzüker ghonda ishika lir, "Russia-i ajungbena talenba kecha makai süngjema alitsü asoshi shidakba inyaktsü mulunga lira, Ukraine-ia yamaji inyaktsü," ta Zelenskyy-i shia liasü.

"Ozü inyaksangshi par den sako asütsü. Condition kecha makai anogo 30 süngjema alitsü onük lapoka lir - Moscow nungi telangzüba arutsüla," ta pai X nung zülü.

Ukraine-ibo iba truce ya April 20 alema atsülangtsü renema lir ta Zelenskyy-i ashi, koba taoba mapang US-i anogo 30 ceasefire alitsü benokba indang jembir amai angateter, kong Ukraine-ibo mulunga lir.

Putin-i pa indang chief of genera staff Valery Gerasimov den senden ka amendang khen atema rara anena atatsü ya sangdong.

"Humanitarian tsütsü ajemaker...Russia-i Easter truce sangdonger. Iba mapang mitkar inyaksangshi ajunga anentsü ni totuyuba agütsür," ta Putin-i Gerasimov dang ashi.

"Asen tatishitsü sülen Ukraine anidaktsü imlar. Kasa mapang iba truce nung tsükchir temi aibelenra nokdangtsü asen sepaitem renema alitsüla."

US tesem ajungalen Trump anema longkak ait

Washington, Rongchii/April 20 (Agencies): Tir Donald Trump-i tawa maparen balala inyakba anema US tesem balala nung nisung meyirijang aika Honibarnü longkak aita liasü.

"50501" (50 protests, 50 states, 1 movemen) nüngja agütsür American Revolutionary War tenzüker küm 250 ajungba anogo den külemi longkak aittsü tebilemba liasü.

White House kimalen aser Tesla dealerships nungi tenzüka aser yimti aika tiyongtsü nung longkak aiter temi tejashi balala lemsatepa liasü. Nisung aikati Kilmar Abrego Garcia meyiba arudaktsütsü akhang, shiba aibelena El Salvador-i yoka lir.

US nung yimtenren tsütsü longkak aitba tali akumer aser April ita tetenzüklen "Hands Off" longkak aitba nunga linük tesem balala nung aliba yimtitem nung nisung meyirijang aika shilem agia liasü.

Gallup ajanga tang tesüsa poll agiba nung voters shilem 45-i Trump kümsük tenzüker mezüng quarter nung pa

inyakyim agizüker, koba pa indang administration mezüngbuba atema kasa mapang poll agiba nung shilem 41 dang liasü.

Ajisüaka ibai 1952 aser 2020 tsüngta shimtetba tirtem indang average first-quarters rating shilem 60 aliba dang nungi tajemba lir.

Honibarnü longkak aitba nungta Trump inyakyim balala indang benoka liasü aser yangji Department of Government Efficiency (Doge) - US sorkar mapa aser danga nung senotsü indokba ajemtsü Trump sentong - aser administration-i El Salvador senso Abrego Garcia meyipa anir arutsü memulungba densema liasü.

Longkak aitba nung mangatettep adokba meliasü, saka Representative Suhas Subramanyam (Democrat) ajanga X nung video ka lemsatepba nung nisung ka Trump maitsü amer nisung telok ka alidaki nungpoka ai aser teloki ain adoka asatepa liasü.

Longkak aiter aikati "No

Kings" ta zülua amer liasü, koba linük nung British yimsüsüba anema nüburtem nokdakba temaitsü liasü.

Ano talisa rongsenketzüng tsütsü Trump tenüng kanga mejungi kumtar. Pa January ita tir akumdang pa indang approval rating ya shilem 47 liasü ta Gallup ajanga ashir.

Ano tawa Reuters/Ipsos poll nunga pa indang approval rating ya shilem 43 kumogo, koba Inauguration Day nung shilem 47 liasü. Rongsenketzüng tsütsü pai inyakba junger ta agizükba shilem 37 lir, koba inauguration mapang shilem 42 liasü.

Ita tetenzüklen America nunger meyirijang aika pa anema adenshia liasü, koba Trum tanaben White House-i meyipa shilangba sülen linük tesem ajungalen yamaji adenshiba rongnung tulutiba liasü.

Item longkak aitba ya Honibarnü dang kanga agi tuluba liasü aser US states 50 nung tesem 1,200 nung ayongzüka liasü.

US-i ano Yemen nung Hodeidah makogo

Sanaa, Rongchii/April 20 (Agencies): United States-i, Hodeidah kübok port aser airport tem 13 ben makogo, ta Houthi den sendaktepaba aliba TV channel Al Masirah-i mettedaktsü.

Anogo ana tejakdang US-i Hodeidah nungsa Ras Isa port maka nisung 80 tepsetba den nisung 150 dak tema yirurtsüba sülen iba ya ataloka liasü.

Al Masirah-i Honibarnü sangdong ka ajanga ashiba agi, US-i linük yimtiba Sanaa nung al-Thawra, Bani Matar, aser al-Safiah district tem amakba sülen nisung asem tepset aser nisung pezü yiruja liasü.

US-i jenjang tesashi agiaka Houthis teloki operation talila

benoka inyaktsü tenangzükba agütsüogo.

US tir Donald Trump indang administration-i, hopta ishika tejakdang Houthis telok anema military jenjang tesashi agitsü sangdongogo. Parnoki ashiba agi, Red Sea nung senzüba rongtem amokmerenba anendaktsütsü nükjidong nung Houthis pur makdar.

2023 küm November ita nungi iba telok yagi Gaza nung Palestine nungertem pusema Israel den sendaka aliba rongtem 100 ben dak temaben makogo.

Hokolbarnü Houthi official Mohammed Nasser al-Atifi-i Al Masirah dang ashiba agi, America nungertemi jenjang agiba ajanga Yemen nungertemi

Gaza pusemba manentsü, saka iba ajanga parnok tali tashitatiba kümdaktsütsü.

Houthis telok ya Yemen nung telungpur tekok ka lir aser parnoki linük yimtiba Sanaa densema linük nung tesem timba atsünger lir. Iba telok ya 1990s nung tenzük saka parnoki 2014 küm Sanaa atsünga tir Abd-Rabbu Mansour Hadi linük toktsür jena odaktsüba sülen parnok tashi ita aküm.

Ras Isa ya Houthis pur nem supply agütsüba aser senotsü teyari agütsüba nokdangtsü nükjidong nung maka liasü, ta US military-i ashi. Washington-i Houthis telok amak tezüker ita 15buba nung Ras Isa amakba ya tesashitiba liasü.

DR Congo-i taoba tir party nem tenokdangba agütsü

Kinshasa, Rongchii/April 20 (Agencies): Democratic Republic of Congo-i, taoba tir Joseph Kabila-er party nem tenokdangba agütsüogo. Pa ya M23 telok shirnoki taküm linük anütoklen tesem aika atsüngogo parnok den sendaktepba aliba atema aitsüogo.

Kabila South Africa nung küm ana aliba sülen linüki meyipa arua lir ta osang prokshir aliba mapang iba tenokdangba agütsüogo.

Pa ya Goma jilai meyipaogo ta osang agütsüogo, koba Rwandan-i teyari agütsüba M23 teloki January ita atsüngogo.

Kabila ya küm 18 tashi DR Congo lenir liasü. Tebu Laurent shiba 2001 küm khaseta liasü pai pa melena liasü. Tir akümba

mapang Joseph Kabila ya arishi küm 29 dang liasü.

Interior ministry sangdong ka ajanga ashiba agi, Kabila'er PPRD party inyakyim ajak nokdangogo, kechiyong parnok M23 den sendaktepa aliba ngutetogo.

Ministry-isa, Kabila-i Goma-i meyipa arutsü telemtetba agiogo, kong pa tsükchirtemi tekümzüikba agütsür, ta ashi.

Ken o dak sendakba nung PPRD-i kecha telangzüba magütsü.

Hokolbarnü sorkari linük ashioktsüba atema arishi küm 53 tain Kabila aitsü aser pa indang kiojen ajak sota ayutsü tetuyuba agüja liasü.

Kabila-i taoba mapang pa M23 den sendaka mali ta

shiogo. Congo sorkari pa anema jenjang agiba dak sendakba nung pai kecha telangzüba agüja mali mesüra pa DR Congo-i meyipa aruba indang memettdaktsü.

Ajisüaka pai iba ita tetenzüklen pa linüki meyipa aotsü ta shiogo. PPRD ketdangsür tejentemi Kabila Goma nung lir ta osang prokshiba ya shitak masü ta shiogo.

Honibarnü pa otongdar Barbara Nzimbi-i X nung Kabila-i taruba ghonda ishika tsüngda mesüra anogo ishika tsüngda linük den jembitsü, ta metetdaktsü.

M23 otongdaria Kabila Goma nung aliba indang osang tejangja magütsü.

ISSF World Cup: Arjun Babuta-i silver angu



Rongchii/April 20, 2025 (Agencies): Paris Olympian Arjun Babuta-i ISSF World Cup nung tebur 10m air rifle event nung silver medal nguogo.

Final nung Babuta (252.3), shiba taoba küm Paris Games nung pezübuba nung tembanga liasü pai 0.1 points agi dang China nung reigning Olympic champion Sheng Lihao (252.4) memenepi liasü.

Kasa mapang nung Hungary nung shooter tejen Istvan Peni, shibai ISSF medals 40 dak tema ngua lir, pai point 229.8 nguteta bronze medal ngua liasü.

Final nung nungtugu asayartem aika liasü, kong

Sweden nung reigning world champion aser Paris silver medallist Victor Lindgren, Norway nung Jon-Hermann Hegg aser India nung taoba mapang world champion Rudranksh Patil nung densema liasü.

Iba asaya nung India nung asayartem medal ana angutsü maongka liasü, saka Rudranksh-i 11benbuba akhaba ya technical infraction ka ajanga tetendangertemi magi kümdakja liasü. Ibayongji India nung asayar ya tibuba nung tembanga liasü.

Final nung Babuta aser Patil napronglai 10.1 nung khashia liasü. Shot 10buba sülen Babuta

tasembuba jenjangi atu.

Patil-i taoba hopta Buenos Aires nung World Cup asayaba mapang gold medal ngur liasü.

Patil tugatoka sülen Babuta-i maneni süngjemshir kanga junga asaya aser shot 14buba sülen pa temaba jenjangi atu.

Hegg atsüngzüka aluba mapang Sheng-i 10s nung ishíben khashia pa tejakdangi tua liasü.

Shot 24 nungi ana anunga lia Babuta 0.3-point agi tejakdang liasü. Ajisüaka Sheng-i 10.9 nung khashia pa tejakdang aküm.

Tatembangbuba shot nung Babuta 10.5 angu saka Sheng-ia 10.3 nung khashia pai gold medal ngua liasü.

Qualification nung Babuta-i mezügbuba relay nung 631.9 angu aser Sheng-i 635.0 ngua pa temaba jenjang nung liasü.

Patil-ia tanabuba relay nung 632.0 ngua pa par telok nung temaba jenjang nung liasü aser ajak senteper pa tasembuba nung liasü.


Alexander Zverev-i Munich Open kokogo

Rongchii/April 20, 2025 (Agencies): Germany nung world number three asayar Alexander Zverev-i Deobarnü pa arishi küm 28 ajungba anogo 6-2, 6-4 agi America nung asayar Ben Shelton koka ATP Munich title benogo.

Iba asayamung nung top-seeded Zverev ya January ita Australian Open final nung Jannik Sinner makokba sülen tang mezügbuba final ka nung asaya aser pai Shelton ayong ayonga kokogo.

Zverev-i tang agi tasembenbuba Munich Open ya kokogo aser ajak senteper ATP title 24buba benogo.

Quarter-final nung Netherlands nung asayar Tallon Griekspoor tera agi dang akokba ama masü, final nungi



Zverev-i tetenzük nungi asaya amokbanger asaya liasü.

Zverev-i kanga junga asayaba ajanga Shelton nem aibelen aika menadaksü aser minute 71 sülen asaya koka liasü.

"Ita ishika tetsükdaksü aika ajangshiogo aser temela masü asü. Nenoki medeni ni tugatoker lila," ta Zverev-i fan tem tenüngsanga ashi.

"Hokolbarnü ni tsüker dang

liasü, saka tang ni takok marok bener nokdaka lir," ta pai ashi.

Shelton ya Andre Agassi sülen America nung asayartem rongnungi clay court nung ATP 500 level tema asayamung ka akokba mezügbuba asayar akümtsü meranga liasü.

Deobarnü iba asayamung akokba ya Zverev form dangi aruba asütsü.

Melbourne nung Sinner makokba sülen Zverev-i asayamung torok nung quarters adena masayatet.

Germany nung asayar shibai clay nung kanga junga asayar, pai pa form atema kecha shisabulua mali aser pa French Open dak rangloker lir, ta ashi koba May tatemlen asayatsü lir.

Yadav, Iyer, Dube nung ajak T20 Mumbai League asayatsü

Rongchii/April 20, 2025 (Agencies): Mumbai Cricket Association (MCA)-i, India nung asayartem ajak T20 Mumbai League nung kechi südir süaka asayatsü ta shiogo. MCA-isa, India ODI aser Test captain - Rohit Sharma 'Face of the League' kümdaktsütsü telemtetba agiogo.

Ajinkya Rahane, Suryakumar Yadav, Shreyas Iyer, Shivam Dube, Prithvi Shaw, Shardul Thakur nung ajak dang parnok England nung oa asayatsü atema meshimra league nung asayatsü tetuyuba agütsüogo.

Yadav, Iyer aser Dube nung amala India team nungi

asayartem iba asayamung nung asayatsü mulunga aliba lemsatepogo.

"T20 Mumbai League nung asayatsü atema Mumbai nungi India team nung asayartem ajak nem osang agütsüogo, koba IPL sülen asayatsü. India team nung asayartem mesüra yirur alirtem dak alaka ajak asayatsü," ta MCA ketdangsür kati ashi.

MCA-i, appearance fees ama India team nungi asayartem ajak nem sen lakh 15 den parnok indang auction sen agütsütsü. "Onoki dang base price aser tanga inyakyimtem inyaktepdar," ta source-isa shisem.

Taruba league atema local

cricket asayar 2800 shi züngoksema lir aser league atema auction May ita agütsü. Association-i IPL tembangba sülen May 26 nungi June 5 tashi iba league ayongzüka asayatsü sentong lir.

MCA-i, league nung ano team ana bendenlokogo aser iba atema taoba hopta bid jaokogo, anungji taküm iba asayamung team ti asayatsü. 2018 küm Season 3 nung North Mumbai Panthers, ARCS Andheri, Triumph Knights Mumbai North East, Namo Bandra Blasters, Eagle Thane Strikers, aser Aakash Tigers Mumbai Western Suburbs ta team trok asaya liasü.

Punjab FC-i Super Cup atema squad sangdongogo

Rongchii/April 20, 2025 (Agencies): Kalinga Super Cup nung Odisha FC den Round of 16 masaya tsünga Punjab FC-i squad sangdongogo. Iba asaya ya Hombarnü Kalinga Stadium, Bhubaneswar nung asayatsü.

Head coach Panagiotis Dilmperis-i team sangdongogo, kong Indian Super League (ISL) season nung asayaba team densema lir. Pai, team nung asayar tejen aser tasentem me yoktepbba aliba ajanga iba asayamung nung team tejakdangi anir aotsü ta amanger.

Team sangdongba indang jembiba mapang Dilmperis-i ashiba agi, "onoki squad ka sangdongogo, shirnok season tepeyong külemi asayaogo. Team-i playoffs tonga masayatetaka ISL season nung kanga junga asayaogo. Iba asayamung nung onoki jelia sentong yanglua meyui asaya ka nungi ka ta asayayonga aotsü aser takok nguyonga aotsü imlar. Onok kanga junga training agiogo aser asayatsü renema lir."

Taküm Punjab aser Odisha FC na asaya Punjab-i ka akok aser ka draw süa liasü. Mezügbuba asaya nung parnoki goal 2-1 agi Odisha akok aser tanabuba asaya nung goal 1-1 agütsür asaya tembanga liasü. 5buba Kalinga Super Cup Deobarnü Kerala Blasters FC aser East Bengal FC na asaya-a tenzüko. Iba asayamung akokba team 2025-26 AFC

Champions League Two Preliminary Round atema qualify asütsü.

East Bengal FC pur defending champions lir. Parnoki 2024 küm final nung Odisha FC koka liasü. Odisha FC (2023), FC Goa (2019) aser Bengaluru FC (2018) nungeria taoba mapang Super Cup kokogo.

Taoba küm ana ama masü takümbo 2018 aser 2019 nung ama iba asayamung ya knockout format nung dang asayatsü, aser iba tetezü asaya ajakji kanga tongtibang lir.

Round of 16 ya April 20, 21, 23 aser 24 nü asayatsü aser quarter-finals April 26 aser 27 nü, semi-finals April 30 nü aser final May 3 nü asayatsü.

Punjab FC squad: Goalkeepers: Ravi Kumar, Muheet Shabir, Ayush Deshwal.

Defenders: Khaiminthang Lungdim, Melroy Assisi, Likmabam Rakesh Meitei, Tekcham Abhishek Singh, Ivan Novoselec, Pramveer Singh, Nongmeikapam Suresh Meitei.

Midfielders: Nikhil Prabhu, Ricky John Shabong, Vinit Rai, Manglenthang Kipgen, Ashis Pradhan, Filip Mrzljak, Laishram Rishikanta Meitei.

Forwards: Asmir Suljic, Petros Giakoumakis, Ezequiel Vidal, Mohammed Suhail F., Ninthoinganba Meitei, Nihal Sudeesh, Luka Majcen, Vishal Yadav, Leon Augustine.

Reserves: Omang Dudum, Manav Singh, Singamayum Shami, Nitesh Darjee.

Virat Kohli-i IPL nung otsü tasen ka yangluogo

Rongchii/April 20, 2025 (Agencies): Royal Challengers Bengaluru nungi nungtugu asayar Virat Kohli-i IPL nung ano Deobarnü otsü tasen ka yanglua pa ya IPL puti otsü nung run tenem dak tema timtiba yangluba asayar kümogo.

Deobarnü Mullanpur nung Punjab Kings den asayaba mapang pai out mesüi ball 54 nung run 73 yanglua IPL nung half-century 59buba aser run tenem mesür iba dang timba 67benbuba yanglua David Warner (66) ajatetogo,

Kohli-i half century 59 aser century 8 yanglua pa temaba jenjang nung lir aser pa sülen Warner lir, shibai half century 62 aser century 4 yanglur lir.

Deobarnü asaya akoktsü atema run 158 arishiba mapang Arshdeep Singh-i Phil Salt kanga kara out süja liasü. Ajisüaka Kohli aser Devdutt Padikkal na senteper run 103 yanglua team jenjang yanglushitsü. Padikkal-ia kanga

junga asaya-a ball 35 nung run 61 yanglu, kong four pongu aser six trok azükba densema liasü.

Kohli-ia asaya kanga junga asadangteta azioka asaya aser over 15buba nung half century yanglua liasü. Paisa, captain Rajat Patidar (12) den senteper run 34 yanglua team takok dangi ania liasü.

Iba sülen Jitesh Sharma-i over 19buba nung Nehal Wadhwa-i ball aonba mapang six ka züka asaya koka liasü. RCB-i iba asaya ya ball teku anunga lia wicket tenet agi akok. Iba asaya akokba sülen RCB pur points table nung tasembuba jenjangi tuogo. Parnoki asaya 8 nung point 10 ngua lir.

Mezügbuba innings nung Krunal Pandya (2/25) aser Suyash Sharma (2/26) nati asaya teyong nung ball kanga junga ona Punjab Kings pur batter tem nem run aika meyangludaksü aser over 20 nung asayar 6 out sür run 157 dang yangludakja liasü.

BILEMDANGANG

"Na temulung süa yipdeni inera temulungtetba tulu nung sakang."